


# Fasnacht 2012

## Fasnachtsgesellschaft Die Aagfrässene Jungi Garde



# Mir ruumen uff!

«S'glemmt», maint s'Comité und jommeret übere Stau:  
Am Märktplatz staut's, am Seibi staut's, und uff de Brugge? Dört staut's au.  
Do hilft nur eins: *Mir ruumen uff!*  
Dramhüsli wägg! – Bänggli wägg! – Das ganze Buff  
muess furt. Denn wird d'Route gstreggt, und zwar bis Rieche  
und dur die Langen Erle zrugg – das schaffe nur die hertschte Sieche;  
do muess me scho rächt Aagfrässe sy! Die andere macht's muff.  
Egal – s'nützt nüt, s'muess sy: *Mir rumen uff!*

«S'glemmt», sait s'Mami und druggt fescht gege d'Düüre vo mym Zimmer.  
Sy druggt und druggt: d'Düür goht nit uff, s'wird immer schlimmer.  
«Do hilft nur eins: *Du ruumsch jetzt uff!*  
D'Düüre blybt scho hängge wäg' däm ganze Buff!  
S'muess furt!» – Jä denn halt, dängg-y mir und mach my dra.  
Die alte Soggen in d'Wösch! Das T-Shirt do? Ziehn-y eh nüm aa.  
Vierhundert Mountainmania-Bildli? Wägg! Die lääre Coladose obedruff.  
Das stresst zwar, doch s'muess amme sy: *Drum ruum-y uff!*

«S'glemmt», sait my Hirni nach em erschte Halbjohr Frühfranzösisch:  
Die Sproch isch eso fremd, und me leert so schlächt, wemme nervös isch.  
Do hilft finalement nur eins: *Mir ruumen uff!*  
Alles Änglische muess uss em Kopf, sunscht gitt's e Buff!  
Statt «am Computer game» heisst's jetzt «jouer all'ordinateur».  
Für e coole Hairstyle gang-y, wie frühener, wider zum Coiffeur.  
Statt Cheeseburger iss-y Fonduebrot, statt Chicken Wings halt Poulet uff.  
Im Sprochegnuusch hilft – ça alors! – nur eins: *Mir ruumen uff!*

«S'glemmt», murmlet dr Sir Alex, dr Trainer vo Manchester ääne.  
ManU, das sinn luter Wältstars. Doch bim Heiko Vogel fliesse keini Dräne:  
«Do hilft nur eins: *Mir ruumen uff!*

und mache die Millione-Kicker muff! »

S'ganze Joggeli rogg und brüllt. Dr FCB spilt stargg:

Dangg em Streller räblet's vorne bald, und hinde luegt dr Park.

Dr Steini breicht nur d'Latte, und als Flügel haut-er denn voll druff –

Kopfball Frei! Gool! Siig! – Münche, mir kömme – *und ruumen uff!*

«S'glemmt», schimpft dr Stroossewüscher am Rhybord unde:

Unter all däm Drägg hätt-er fascht dr Bäse nümm gfunde.

Do hilft nur eins: *Ruumed alli uff!*

Fläschli, Dose, Grillkohle – das ganze Buff

muess wägg. Statt ass mr dä Grümpel do löhn ummegammle,

wämmer-en – unsrer schöne Stadt z'lieb – lieber zämmesammle.

Am Rhy wämmer zämme fyre, aber suuber, fröhlig, nit im Suff –

und denn e Schwumm dr suber Bach ab! – *Mir ruumen uff!*

«S'glemmt», haisst's ganz am Aafang vo dr Goschdym-Planig.

Doch bim Aabligg vom Stoffräschte-Bärg hett d'Schnydere en Ahnig:

«Do hilft nur eins: *Mir ruumen uff*

und bruche alli Fätzen uff!»

Drum sinn mir Ueli nummen uff en erscht Bligg glych. Doch luegsch genau,

denn gsesch: Jede isch e Einzelstügg, ob grünen, ob orangsch oder blau.

Uss Räschte gmacht, doch schampar schön: Die Ueli fallen uff.

Recycling lohnt sich ebe. Drum mached mit, wenn's s'näggscht Moll heisst: *Mir ruumen uff!*

*Am Cortège isch amme, me kennt das, e ganz grosses Buff.*

*Aber dasch halb so schlimm, denn am Mäntig z'Obe ruume-mer uff*

*und bringe d'Lampe alli zämme uff e Münschterplatz,*

*wo sy lüchte und funggle, dä heerlig Künschtler-Schatz.*

*Sy blybe dört oobe bis am Mittwoch am Morge stooh.*

*S'gseht wunderschön uss; sottsich unbedingt go luege go!*

*Die erscht Lektion: Alli Junge Garde stelle sich uff em Barfi vor und hoffe*

*am Frytig Noomidaag, am 2. Meerz, und am Samschtig, am 3. Meerz, uff vyli Bsuecher*

*und Jungi, wo Inträsse hänn.*

*Wottsich lehre drummle oder pfyffe und in ere tolle Junge Garde Fasnacht mache, so*

*mäld Di bi uns aa. Kumm äntwäder an die erschti Lektion ufem Barfi oder kunsch am*

*Samschtig, em 3. Meerz, vom elfi bis am drey zum Ykaufszentrum Gartestadt*

*z'Münchestai zu unserer erschte Lektion. Mälde kasch Di au bi der Obfrau mit em Delifon*

*076 528 57 77 oder unter folgender Mail-Adrässe: [Jungi.Aagfraesseni@gmx.net](mailto:Jungi.Aagfraesseni@gmx.net).*

*Du findsch uns au im Internet unter [www.dieaagfraessene.ch](http://www.dieaagfraessene.ch).*

---

D Ladäärne kaa me vom Mäntig znacht bis am  
Mittwuch demorge uff em Minschterblatz bewundere

---

Druggerey Runser Druck & Satz AG, Basel